

四庫全書

史部

欽定四庫全書

唐會要卷二十二

宋 王溥 撰

社稷

舊儀注祭犧牲不得捶扑傷損死則埋之若有創病者
別卜

武德九年正月親祀太社詔曰吉日惟戊親祠太社率
從百僚以祈五穀今既南畝俶載東作方興州縣致祀

宜盡祇肅四方之人咸勤殖藝別其姓類命為宗社京
邑庶士臺省羣官里閭相從共遵社法以時供祀各申
祈報具立節文明為典制

咸亨五年三月十日詔春秋二社本以祈農比聞除此
之外別立當宗及邑義諸色等社遠集人衆別有聚斂
遞相承糾浪有徵求雖於吉凶之家小有裨助在於百
姓非無勞擾自今以後宜令官司禁斷

神龍元年五月詔於東郊建置太社禮部尚書祝欽明

問禮官博士曰周禮田主各用所宜之木今太社主用石何也禮官太常少卿韋叔夏國子司業郭山暉太常博士張齊賢尹知章議曰春秋傳曰君以軍行祓社釁鼓祝奉以從書曰不用命戮於社社主蓋用石為之奉謂將行也鄭玄亦以社主用石崔靈恩三禮義宗曰社之主用石以土地所主最為實故用石也又呂氏春秋云殷人之禮其社用石後魏書云天平四年四月太社石主遷於社宮是社主用石古有明說周禮田主各用

所宜之木者彼謂人間之社非太社也又檢舊社主長
今尺六寸方一尺七寸付禮官博士等議其制度禮官
韋叔夏等又議曰社主制度長短在禮無文且天子親
征又載社主謂之社事則社之神主可載而行今詳議
以為主既可載明非過重案郊特牲云社祭土而主陰
氣韓詩外傳又云天子太社方五丈諸侯半之蓋以五
是土數故壇方五丈其社主望准五數長五尺准陰之
二數方二尺剡其上以象物生方其下以象地體埋其

半以根在土中而本末均也則神道設教法象有憑其
尺請用古尺又檢舊社稷壇上四方設以方色惟中央
數尺以黃土韋叔夏等又議曰韓詩外傳云天子太社
廣五丈各分置四方色訖上冒以黃土說者云冒以黃
土者象王者覆被四方據此則合用黃土遍覆壇上今
檢舊壇之上亦被方色唯中央數尺飾以黃土則是覆
被之道有所不及既乖舊制望請准古改造於是以方
色飾壇之四面及四陞其上則以黃土覆之祝欽明又

建議曰周頌載芟篇叙曰春耤田而祈社稷也禮記天子為耤千畝諸侯耤百畝即此緣有耤田自為立社王社侯社因此有名卿大夫以下無耤田所以成羣置社耤田壇祭止是王社往者直云耤田近日改名先農之祭不知王社根本魏代妄設三牢羣說紛紜乍毀乍立晉氏徒云省廢不知仍在耤田千畝共迷其目因久不詳經典致此謚譁今者創立社稷理宜正名典故請改儀注及式將先農以為帝社使人聽不惑古義具存移

前代之末學表當今之準繩豈不美歟諸禮官審加詳議禮官韋叔夏博士張齊賢等議曰謹按祭法云王者立大社然王社所祭之處書傳無文漢書郊祀志漢興已有官社未立官稷遂於官社後立官稷以夏禹配食官社以后稷配食官稷臣瓚云案高紀立漢社稷所謂大社也時又有官社配以夏禹所謂王社也見漢祠令而未立官稷至此始立之光武中興不立官稷相承至今魏以官稷為帝社故摯虞議曰魏氏故事立大社帝

社是也晉初或廢或置皆不言當時所置之處或云兩社同處王社在大社之西崔氏皇甫氏並云王社在耜田引詩耜田而祈社稷為證本謹案衛宋漢舊義春始東耕於耜田官祀先農則神農也又五更要義云立壇於田所以祠先農其制度如社魏秦靜議云風伯雨師靈星先農與社稷為國之六神晉太始四年上耕於東郊以太牢祀先農又周隋舊儀及皇朝新禮先農皆祭帝神農配以后稷是則王社先農其來自遠各在祀典

不可合而為一今欲崇立帝社實會禮經望於藉田之中別立帝社帝稷配以禹棄則先農帝社兩祠咸秩協載芟之義符祭法之文祝欽明又議曰藉田之祭本是王社承前若祠先農共是勾龍后稷烈山之子亦謂之農周棄繼之皆祀為稷共工之子后土主名湯既勝夏欲遷不可社稷主祭唯此二神祭法所載祀典皆自皇帝以下義農二皇不列常祀豈有社稷祭上取炎皇正經典籍曾無此語膚淺諸儒妄為曲說假如蜡主先穡

鄭玄云若神農徒見易之揉木即云若神農耳如其遠
推邃古磨蜉在神農前將為先穡有何不可此鄭之謬
妄不尋祭法根源後儒守株即以為定始立社稷祈報
唯祭共工烈山神農來報大工功何不遠取祈報即明
三皇以上樸略洪荒帝王之道無取為教魏秦靜者又
何知社稷先農妄分為二且六宗之義先儒猶且紛然
六神之言秦靜憑何分析習俗迷謬殊不可依豈有一
耜田中置四壇壇先農王社同貫異名一種后稷勾龍

道更無形影分祭四牢徒費豈是爾愛其羊又言漢祀
禹神此義更殊未得若將禹平水土功大於勾龍成湯
草夏社時何不替勾龍祀周棄既將易祀夏禹寧可獨
遺漢德不逮殷湯祀禹無乃為諂後王更無遵用明其
一時謬僻禮官今欲效法張禹無乃不究於前以王社
沒於先農欲依祀典正號今乃更加兩祀亦恐刺謬增
多退傳禮官更重詳度其依經典勿據俗儒於是韋叔
夏張齊賢等又奏曰謹按經典無先農之文禮記祭法

云王自為立社曰王社先儒以為其社在耜田之中詩載芟云春耜田而祈社稷是也永徽年中猶名耜田垂拱以後刪定始改為先農與社本是一神妄有改張以惑人聽其先農壇且請改為帝社壇以應禮記王社之義其祭先農禮改為帝社禮準令用孟春吉亥祀后土以勾龍氏配之從之於是改先農壇為帝社壇於帝社壇西置帝稷壇禮同太社太稷其壇不備方色所以異於太社也至開元定禮除章稷之議祀神農氏於壇配

以後稷至今以為常典也

開元十九年正月二十日勅普天率土崇德報功饗祀
惟殷剗割滋廣非可以全惠養之道協靈祇之心其春
秋二時社及釋奠天下諸州府縣等並停牲牢惟酒用
脯務存修潔定展誠敬自今以為常式至二十二年三
月二十五日勅春秋祈報郡縣常禮比不用牲豈云血
祭陰祀貴臭神何以歆自今以後州縣祭祀特以牲牢
宜依常式其年六月二十八日勅大祀中祀及諸州縣

社稷依式合用牲牢餘不用牲牢合並用酒脯至貞元五年九月十二日國子祭酒包佶奏春祭社稷準禮天子社稷皆太牢至大厯六年十月三日勅中祀少牢社稷是中祀至今未改勅旨宜準禮用太牢天寶元年十月九日勅社為九王之尊稷乃五穀之長春祈秋報祀典是尊如聞祭官祇事不全備禮朕永惟典故務在潔誠俾官吏之盡心庶蒼生之蒙福今後祭官等庶事之間倍宜精潔兩京委御史臺諸郡委採訪使有違犯者

社壇側近仍禁樵牧其百姓私社亦宜與官社同日致祭所由檢校三載二月十四日詔社稷列為中祀頗紊大猷自今以後社稷及日月五星並升為大祀仍以四時致祭諸星為中祀長慶三年正月祠部員外充太常禮院修撰王彥威奏謹按禮云社者神地之道也郊特牲而社稷太牢鄭玄以為國中之神莫貴於社故前古為大祀至天寶三載二月十四日勅云祭祀之典以陳至敬名或不正實相奪倫況社稷孚祐百代蒙福列為

中祀頗紊大猷自今以後升為大祀爾後因循又依開元禮為中祀然而牲用太牢太尉攝行事祭之日不坐並是大祀之儀足知列為中祀是因循謬誤教人報本未極崇嚴有國之儀唯此厭屈今請準勅升為大祀庶合禮中從之開成五年十一月吏部奏準四年正月詔書大祠並差三品以上官充祭太社太稷攝司徒司空並合差三品官行事伏緣請司三品官員額絕少其中或有假故無官可差其每年祭太稷攝司徒司空請準

舊例取左右庶子少詹事及諸司少卿監通攝制可

祀風師雨師雷師及壽星等

天寶四載七月二十七日勅風伯雨師濟時育物謂之
小祀頗紊彝倫去載衆星以為中祀永言此義固合同
升自今以後並宜升入中祀仍令諸郡共各置一壇因
春秋祭祀之日同申享祀至九月十六日勅諸郡風伯
壇請置在社壇之東雨師壇在社壇之西各稍北三數
十步其壇卑小於社壇造其祀風伯請用立春後丑祀

雨師立夏後申祀所祭各請用羊一籩豆各十簋簋俎一酒三斗應緣祭須一切已並以當郡公廨社利充如無即以當處官物充其祭官準祭社例取太守以下充五載四月十七日詔曰發生振蟄雷爲其始畫卦陳象威物效靈氣寔本於陰陽功大施於動植今雨師風伯久列於常祠唯此震雷未登於羣望其以後每祭雨師宜以雷師同壇祭共牲別置祭器至貞元二年四月二十三日詔問禮官其風師雷師祝版署訖合拜否太常

博士陸淳奏曰以是小祀準禮又無至尊親祭之文今雖請御署校詳經據並無拜禮詔曰風師雨師為中祀有烈祖成命況在風雨至切蒼生今禮雖無文朕當屈

己再拜以申子育之意仍永為常式

本是小祀開元禮無樂章及升為中

祀乃用登歌一部天寶以來嘗借天帝樂章用之本太常卿董晉奏請補其闕至貞元六年五月十四日詔秘書監包佶補之雨師亦準此風師壇舊在通地門外道北二里貞元三年閏五月二十一日以宮城喧呼虧於宿敬又近章敬寺恐神靈不安詔有司於滌水東擇地移之其年七月二十一日遣太常少卿裴郁致祭告移之
四年四月詔有司自開元以來升風師雨師為中祀

假郊廟樂章未奏撰遂令于邵等分撰之六年五月以風師雨師武成王等樂章付有司施行之

元和十五年太常禮院奏來年正月三日皇帝有事於南郊同日立春後丑祀風師按周禮大宗伯官猶以燎祀風師鄭玄云風箕星也故令禮立春後丑於城東北就箕星之位為壇祭之禮祀昊天上帝於圜丘有神咸秩箕星從祀之位在壇之地三等伏以皇帝有事於南郊徧祭之義百神咸在其五方帝并日月神州以下緣

對昊天上帝皇地祇尊不得申並為從祀悉無上公行事并御署祝版之儀風師既是星神厭降之儀便當陪祭如非遇郊祀其時祭祀如常儀

開元二十四年七月十二日有上封事者言月令云八月日月會於壽星請於太社壇享之勅宜令所司特置壽星壇常以千秋節日修其祀典二十六日勅壽星壇宜祭老人星及角亢七宿著之常式

嶽瀆

武德二年十月二十九日親祀華岳舊儀嶽瀆以上祝版御署訖北面再拜證聖元年有司上言曰伏以天子父天而母地兄日而姊月於禮應有再拜之儀謹按五嶽視三公四瀆視諸侯天子無拜公侯之禮臣愚以為失尊卑之序其日月以上請依舊儀五岳以下署而不拜制可之

開元十一年四月二十六日勅霍山宜崇飾祠廟秩視諸侯蠲山下十戶以為洒掃晉州刺史春秋致祭二十

五年十月八日勅三時不害百穀用成遂使京坻徧於天下和平之氣既無遠而不通禋祀之典亦有祈而必報宜令中書令李林甫等分祭郊廟社稷尚書左丞相裴耀卿等分祭五岳四瀆至二十八年十月三日勅感而遂通神之鑒也祈而必報禮之經也今農已畢功歲則大稔京坻之積震海攸同用陳蠲潔之薦以答明禋之祉宜令侍中牛仙客等分祭郊廟社稷岳瀆等其四海四鎮及名山岳瀆使有道路由過者亦宜便祭至天

寶元年十二月二十八日詔令歲西成頗為善熟宜令
光祿卿嗣鄭王希言等分祭五岳其四瀆名山並委所
由郡長官擇日致祭至天寶七載十一月十七日朕祇
肅郊祀祈在三農冀幽贊之有憑必昭報而無闕宜令
工部尚書郭虛已等分祭五岳四瀆八載九月三十日
詔稼穡豐穰羣官樂業思崇聖秩用展虔誠宜令崇正
卿褒信王璆分祭五岳四瀆又至天寶十載二月二十
一日遣嗣吳王祗等分祭五岳四瀆具行冊禮至元二

年八月詔太常卿裴郁等十人名就方鎮祭岳瀆等舊禮皆因郊祀望而祭之天寶中始有遣使祈福之祀至德中又加西嶽金天王中嶽中天王及諸岳瀆王公之號令用遣使之禮非正也其年五月十五日太常卿董晉奏五岳四瀆伏準開元禮每年各以五郊迎氣日祭之其祝版並合御署自上元元年中祀小祀一切權停自後因循不請御署其祝版應至饗祭日所司準式先進取御署附驛發遣勅旨宜依仍委所司每至時先奏

附中使送往十二年二月太常博士裴堪奏謹按舊儀
嶽瀆以祝版御署訖北面再拜證聖元年有司上言曰伏
以王者父天而母地兄日姊月於禮應有再拜之儀謹
按五嶽視諸侯之禮其日月以上請依舊儀五岳以下
署而不拜制可至元修理五嶽四瀆皇帝無親祭禮儀
其祝文皆云嗣天子某謹遣某官敢昭告於某嶽某瀆
之神讀訖皆申再拜祭五龍神但云獻官再拜此則有
司行事皆有拜文今臣與禮官等通詳典制整辨所宜

蓋聞禮擬於時議則求古無文可質正者則推類以明之臣愚以為三才之尊各申所極尊有所統禮亦宜差若無比視何以辨等故禮云五嶽視三公四瀆視諸侯其餘山川視伯子男議者以岳瀆既比公侯則禮如入臣矣其於祭也則人君不合有拜臣之儀謹按五經義云星辰日月五岳四瀆皆天地之別神從官也因郊而祭者緣天地之意亦欲及之也又禮記云非其臣則答拜鄭玄注云不臣人之臣也則星辰嶽瀆既是天地從

官恐人君不得如公侯之禮而臣下之也何以言之王者父天母地兄日姊月星辰視昆弟嶽瀆視公侯以此明之星辰岳瀆是天地之臣故秩視人臣也陛下與天地為子遣使申祭恐不合令受天父地母從官之拜宜有以答之故開元禮祭岳瀆祝文皇帝稱名又云謹遣於義有必拜之文是國家著禮以明神為敬不以臣下為禮以臣等所見並請依證聖元年定制有司行事須申拜禮

前代帝王

顯慶二年七月十一日太尉長孫無忌議曰謹按祭法云聖王之制禮也法施於人則祀之以死勤事則祀之以勞定國則祀之能御大災則祀之能捍大患則祀之又堯舜禹湯文武皆有功烈於人及日月星辰人所瞻仰非此族也不在祀典准此帝王合與日月同例常加祭享義在報功爰及隋代並尊斯典其漢高祖祭法無文但以前代及今多行秦漢故事始皇無道所以棄之

漢高興章法垂於後自隋以上亦在祀例大唐稽古垂
化罔羅前典唯此一禮咸秩未申令新禮及令無祭先
代帝王之文今請幸遵故實修附禮文令三年一祭仍

以仲春之月祭唐堯於平陽

以契配之

祭虞舜於河東

以皋陶配

祭夏禹於安邑

以伯益配

祭殷湯於偃師

以伊尹配

祭周文於鄧

以太公配

祭武王於鎬

以周公召公配

祭漢祖於長陵

以蕭何配

詔可麟

德二年車駕東幸將封岱嶽十一月至滎陽祭紀信墓

追贈驃騎大將軍

開元二十一年正月一日詔自古聖帝明王岳瀆海鎮
用牲牢餘並以酒脯充奠祀其年十一月六日雲州置
魏孝文帝祠堂有司以時享祭

州有魏故明堂遺址
乃於其上置廟也

天寶二年三月二十八日追尊臯陶為德明皇帝涼武
昭王為興聖皇帝各與立廟每歲四季月享祭至寶應
年禮儀使杜鴻漸請停四時享獻三年五月二十二日
置周文王廟以同德十人四時配享六歲正月十一日
勅三皇五帝創物垂範永言殷祀宜有欽崇三皇伏羲

以句芒配

神農

以祝融配

軒轅

以風后力牧配

五帝少昊

以蓐收配

顓頊

以玄冥配

高辛

以稷契配

唐堯

以羲和叔仲配

虞舜

以夔龍配

其擇日及置廟地量

事營立其樂器請用宮懸祭請用少牢仍以春秋二時

致享共置令丞令太常寺檢校七載五月十五日詔上

古之君存諸氏號雖事先書契而道著皇王緬懷厥功

寧忘咸秩其三皇以前帝王宜於京城內共置一廟仍

與三皇五帝廟相近以時致祭天皇氏地皇氏人皇氏

有巢氏燧人氏其祭料及樂請准三皇五帝廟以春秋

二時享祭歷代帝王肇跡之處未有祠宇者所由郡置

一廟享祭仍取當時將相德業可稱者二人配享夏禹

王都安邑

今夏縣以虞伯益秩宗伯夷配

殷王湯都亳

今穀縣以伊尹左相仲虺

配

周文王都鄴

今咸陽縣見有廟以師鸞熊齊太公望配之

周武王都鎬請

入文王廟同享

太師周公太保召公配

秦始皇帝都咸陽

丞相李斯將軍

王翦配

漢高祖起沛

今彭城縣良相國蕭何配

後漢光武皇帝起

南陽

司徒鄧禹將軍耿弇配

魏武皇帝都鄴

侍中荀彧太尉鍾繇配

晉武帝

都故洛陽

司空張華大將軍羊祜配

後魏道武皇帝起雲中

太尉長孫嵩尚

書崔玄伯配

周文帝起馮翊

尚書蘇焯大將軍于謹配

隋文帝封隋漢東

僕射高顯大將軍賀若弼配

令郡縣長官春秋二時擇日染盛蔬饌

時菓配酒脯潔誠致祭其忠臣義士孝婦烈女史籍所

載德行彌高者所在宜置祠宇量事致祭殷相傳說

汲郡

殷太師箕子

汲郡

宋公微子

睢陽郡

殷少師比干

汲郡

齊相管

夷吾

濟南郡

晉卿羊舌叔向

絳郡

魯卿季孫行父

魯郡

鄭卿東

里子產

滎陽郡

燕上將軍樂毅

上谷郡

趙卿藺相如

趙郡

楚三

閭大夫屈原

長沙郡

漢大將軍霍光

平陽郡

漢太傅蕭望之

萬年郡漢丞相丙吉魯郡蜀丞相諸葛亮南陽郡以上忠臣一

十六人周太子吳太伯吳郡伯夷叔齊並河東郡吳延陵季

札丹陽郡魏將段干木陳郡齊高士魯仲連濟南郡楚大夫申

包胥富水郡漢將軍紀信華陽郡以上義士八人周太王妃

太姜新平郡周王季妃太任扶風郡周文王妃太姒張掖縣配享文

王之廟魯大夫妻敬姜魯郡鄒孟軻母魯郡陳國孝婦睢陽郡曹

世叔妻大家扶風郡以上孝婦七人周宣王齊姜長沙郡衛

太子共姜汲郡楚莊樊姬富水郡楚昭王女富水郡宋公伯姬

睢陽郡

梁宣高行母

陳留郡

齊杞梁妻

濟南郡

趙將趙括母

趙郡

漢成帝班婕妤

扶風郡

漢元帝馮昭儀

咸陽郡

漢太傅王陵

母

彭城郡

漢御史張湯母

萬年縣

漢河尹嚴延年母

東海郡

漢

淳于緹縈

濟南郡

以上烈女一十四人並令郡縣長官春

秋二時擇日准前致祭歷代帝王廟每所差側近人不

課戶四人有關續填仍關戶部處分至十二載七月二

十八日有勅停廢九載十一月十六日周武王漢高祖

於京城內各置一廟并置官吏

貞德二年八月道士李國正奏皇室仙系修崇靈路請
於昭應縣南三十里山頂置天華上宮露臺天地三婆
父皇道君太古天皇中古伏羲媧皇等祠堂并置洒掃
宮戶一百人又於縣之南義扶國故湫置祠堂並許之
昭應縣令梁鎮上疏其畧曰天地婆父祀典無文言甚
不經義無可取若陛下將並天地祖宗之廟必上天貽
向背之責又夫湫者龍之窟也龍得水則神無水則螻
蟻之匹也故知水存則龍在水竭則龍亡今湫竭已久

龍安所存何必崇飾祠宇豐潔奠享其三皇五帝則兩
京及所都之處已建宮觀祠廟時設齋醮饗祀其湫既
竭不可更置祠堂又不當更為天地建立祖宗廟臣並
請停其三皇道君天皇伏羲女媧等既先各有廟望於
本祠依禮齋祭制曰可

大歷五年四月廊坊節度使臧希讓上言坊州軒轅皇
帝陵闕請置廟四時饗祭列於祀典詔從之

永泰二年五月詔道州舜廟宜蠲近廟兩京克掃除

刺從

史元結
所請也

元和十四年正月勅周文王武王祠宇在咸陽縣宜令
有司精加修飾

天祐二年六月十五日封楚三閭大夫屈原為昭靈侯
舜帝二妃祠為懿節祠

龍池壇

開元二年閏二月詔令祀龍池六月四日右拾遺蔡孚
獻龍池篇公卿以下一百三十篇太常寺考其詞合音

律者為龍池篇樂章共錄十首

紫微令姚元崇右拾遺蔡季太府少卿沈佺期

黃門侍郎盧懷慎殿中監姜皎吏部尚書崔日用紫微侍郎蘇頲黃門侍郎李義府工部侍郎姜晞兵部侍郎

裴崔等文為樂章

十六年詔置壇及祠堂每仲春將祭則奏之

十八年十二月二十九日有龍見於興慶池因祀而見也初太常卿韋縚草祭儀縚奏曰臣謹按周禮以鬻辜祭四方百物祭法曰龍出雲為風雨者皆曰神龍者四靈之畜亦百物也能為雲雨亦曰神也禮有公食大夫饗之文即生曰食亦曰饗矣其饗之日合用仲春之月

易曰震為龍震者東方春用於時二月也饗之法請用
二月有司筮日池傍設壇官致齋設籩豆如祭雨師之
儀以龍致雨也其牲用少牢樂用鼓鐘奏姑洗歌南呂
鄭玄云風師雨師及小祀用此樂凡六變者三變而致
鱗物今享龍亦請三變舞用武舞樽用散酒以一獻周
禮曰凡祭羣小祀用之也詔從之

二十三年五月一日宗子請率月俸於興慶宮建龍池
聖德頌以紀符命望令皇太子中書令張九齡禮部尚

書李林甫充檢校使從之五日宗子請令寧王憲題額

侍中裴耀卿充摸勒使

至天寶二年五月五日明皇建
立殿中監袁信王璆撰文皇太

子書并

題額

貞元六年六月復祭五龍壇

元和十二年四月上以自春以來時雨未降正陽之月
可雩祀遂幸興慶宮堂祈雨忽有一白鷗鷁浮沉水際
羣類翼從左右咸異之俄而不見方悟龍神之變化遂
相率蹈舞稱慶後大雨果下

唐會要卷二十二

欽定四庫全書

唐會要卷二十三

宋王溥撰

武成王廟

開元十九年四月十八日兩京及天下諸州各置太公廟一所以張良配享春秋取仲月上戊日祭諸州賓貢武舉人准明經進士行鄉飲酒禮每出師命將辭訖發日便就廟引辭仍簡取自古名將功成業著弘濟生人

准十哲例配享至乾元元年九月十二日太常少卿于休烈奏臣比者因秋享漢祖廟見傍無侍臣享太公廟有張良在側伏以子房生于漢楚翊奉高祖坐帷幄定天下考其年代不接太公自古配食廟庭陪葬陵寢皆取當時佐命同受哀榮太公人臣不合以張良配享請移於漢祖廟勅旨依

上元元年閏四月十九日勅文定禍亂者必先于武德拯生靈者諒在于師貞昔周武創業克寧區夏惟師尚

父寔佐興王況德有可師義當禁暴稽諸古昔爰崇典
禮其太公望可追封為武成王有司依文宣王置廟仍
委中書門下擇古今名將准文宣王置亞聖及十哲等
享祭之典一同文宣王至建中三年閏正月二十五日
禮儀使顏真卿奏武成王廟用樂臣伏以自太公封武
成王追封之禮與諸侯王名位義同廟庭用樂合准諸
侯之數今請每至釋奠奏軒懸之樂勅旨宜付所司至
七月十一日史館奏伏奉今年五月十五日勅武成王

廟配享人等宜令史館參詳定名聞奏者又准開元十

九年四月勅宜揀取自古名將十人充十哲

漢太子少傅張良先

已配享齊大司馬田穰苴吳將軍孫武魏河西太守吳起燕昌國君樂毅秦武安君白起漢淮陰侯韓信蜀丞相諸葛亮尚書右僕射衛國公李靖司空英國公李勣

七十二弟子

齊將孫臏越相國范蠡趙將信平君廉頗齊將管仲齊將安平君田單趙將馬服君

趙奢大將軍武安君李牧秦將王翦漢相平陽侯曹參梁王彭越右丞相絳侯周勃太尉絳侯周亞夫大司馬冠軍侯霍去病大將軍長平侯衛青後將軍營平侯趙充國前將軍李廣後漢太傅高密侯鄧禹大司馬廣平侯吳漢征西將軍夏禹侯馮異建威將軍好時侯耿弇執金吾冠恂佐將軍膠東侯賈復伏波將軍新息侯馬

援太尉新豐侯段熲魏太尉鄧艾征東將軍晉陽侯張
遼太尉魏里侯皇甫嵩蜀前將軍壽亭侯關公車騎將
軍西鄉侯張飛吳南郡太守周瑜南都太守孱陵侯呂
蒙大司馬陸抗丞相陸遜晉征南將軍南城侯羊祜鎮
南將軍當陽侯杜元凱撫軍將軍襄陽侯王濬太尉長
沙公陶侃車騎將軍康樂侯謝玄前秦丞相王猛前燕
太宰慕容恪宋司空武陵侯檀道濟征虜將軍王鎮惡
後魏太尉長孫嵩北齊左僕射太原慕容紹宗右丞相
咸陽王斛律光梁太尉王僧辨周大冢宰宇文獻太傅
燕國公于謹右僕射鄭國公韋孝寬陳司空南平公吳
明徹隋尚書令趙國公楊素右武侯將軍宋國公賀若
弼上柱國新義公韓擒虎上柱國太平公史萬歲皇朝
司空河間王孝恭右武侯將軍鄂國公尉遲敬德右武
衛大將軍邢國公蘇定方禮部尚書開喜縣公裴行儉
夏官尚書王孝傑左武侯將軍韓國公張仁亶兵部尚
書中山郡公王峻兵部尚書代國公郭元振太尉臨淮

王李光弼太尉
汾陽王郭子儀

天寶六年正月勅鄉貢武舉人上省先令謁太公廟每
拜大將及行師克捷亦宜告捷

貞元二年二月刑部尚書知刪定關播奏上元詔擇古
今名將十人于武成王廟配饗如文宣廟之儀伏以太
公古稱大賢今其下置亞聖賢之有聖于義不安且孔
門十哲皆是當時弟子今所擇名將年代不同於義既
乖於事又失臣請刪去名將配享之儀及十哲之稱從

之四月詔武成王廟樂章並未奏撰宜令于邵等撰進
四年八月十三日兵部侍郎李紆奏准開元十九年勅
置廟以張良配享准式以太常卿少卿丞等充三獻官
祝文云皇帝遣某官敢昭告于至上元元年追贈為武
成王享祭之典一同文宣王有司因差太尉充獻兼進
禮于親署臣以今月三日蒙差攝祭方覩廟儀伏以太
公即周之太師張良漢之少傅聖朝列于祀典已極褒
崇載在祠官必資折衷理或過當神何敢當今者屈禮

于至尊致敬于臣佐每謂御署並稱昭告于上下之祭
竊謂非宜一同文宣王恐未為允臣以為文宣王垂教
百代宗師五常三綱非其訓不明有國有家非其制不
立故孟軻稱自生人以來一人而已由是正素王之法
加先聖之名樂用宮懸獻差太尉尊師崇道雅合正經
且太公述作止于六韜勲業形于一代豈可擬其盛德
均其殊禮哉前件祝文請自今更不進署其敢昭告請
准式差太常卿以下詔令百寮集議聞奏兼大理卿于

頡等四十六人議同李紆尚書右司侍郎中嚴沆等議
曰謹按李紆所奏援引訓典比量禮度祝文輕重之殺
獻官尊卑之節誠至當矣推而廣之抑未盡也夫人名
徽號先聖所以褒前哲令德之人謂其言可以範圍其
行可以施百代其業可以振千古苟未至也則不虛美
夫以太公兵權奇計之人適當殷辛失德八百諸侯皆
歸於周時惟鷹揚以為佐命在周有大功矣于殷謂之
何哉祀典不云法施于人則祀之如仲尼之祖述堯舜

憲章文武刪詩書定禮樂使君君臣臣父父子子後王
及學者皆宗師之可謂法施于民矣貞觀中以其兵家
者流始令磻溪立廟開元中漸著上戊釋奠之禮其于
進寵不為薄矣上元之際執事者苟以兵戎之急遂尊
武成封王之號擬議于文宣王優劣萬殊不可以訓禮
不云乎擬人必於其倫太公之于聖人非倫太史公以
韓非與老子同傳人到于今非之高祖封韓信為侯自
恥於絳灌等列况聖朝褒美之稱其可雷同乎愚以為

宜去武成及王字依舊令為齊太公廟人無間言矣享
獻之事餘依李紆所奏刑部員外郎陸淳等六人議曰
臣聞統天下者禮法也救天下者權數也拯難者常以
權變禮以數易法有國者則尚德而賤數尊禮而晦權
何者禮法行則人安其分務于修身權數騁則人思變
常務于苟得安其分理之源也思變常亂之本也故救
一時之弊者事不可貽于將來垂萬世之法者道必不
行于當代竊以武成王殷臣也見紂之暴不能諫而佐

武王以傾之于周則社稷之臣矣於殷謂之何哉且夫尊其道者必師其人必尚其行使天下之人入是廟也登是堂也稽其人可以思見師其道所由致法則俾夫立節死義之士安所措其心乎聖人所以尊堯舜賢夷齊不法桓文不贊伊呂先之以敬讓尊之以禮樂蓋謂此也使武成之名與文宣為偶權數之畧與道德齊衡恐非不刊之典也臣愚謂宜罷上元追封立廟之制依貞觀於礪溪置祠令有司以時享奠斯得禮之正也左

領軍大將軍令狐建等二十四人議曰當今兵革未偃
宜崇武教以尊古重忠烈以權今欲有貶損恐非激勸
之道也追尊王位以時祀之為武教之至若不尊其禮
則無以重其教也文武二教固同其偏廢亦不可況其
典禮之制已歷三聖今欲改之恐非其宜也至九月十
六日有勅以上將軍以下充獻官餘依李紆所奏

天祐二年八月十三日中書門下奏遷都以來武成王
廟元未置立今請改為武名王選地建造其制度配享

皆准故事從之

寒食拜掃

龍朔二年四月十五日詔如聞父母初亡臨喪嫁娶積習日久遂以為常亦有送葬之時共為歡飲遞相酬勸酣醉始歸或寒食上墓復為歡樂坐對松楸曾無戚容既玷風猷並宜禁斷

開元二十年四月二十四日勅寒食上墓禮經無文近代相傳浸以成俗士庶既不合廟享何以用展孝思宜

許上墓用拜掃禮於塋南門外奠祭徹饌訖泣辭食餘
于他所不得作樂仍編入禮典永為常式

二十九年正月十五日勅凡庶之中情禮多闕寒食上
墓便為燕樂者見任官典不考前資殿三年白身人決
一頓

貞元四年正月詔比來常參官請假往東郊拜掃多曠
廢職事自今以後任遣子弟以申情禮

元和三年正月勅朝官寒食拜掃又要出城並任假內

往來不須奏聽進止

長慶三年正月勅寒食掃墓著在令文如聞比來妄有妨阻朕欲令羣下皆遂私誠自今以後文武百官有墓塋域在城外并京畿內者任往拜掃但假內往來不限日數有因此出城假開不到者委御史臺勾當仍自今以後內外官要覲親于外州及拜掃並任准令式年限請假

太和三年正月勅文武常參官拜掃據令式五年一給

假宜本司准令式處分如登朝未經五年不在給假限
開成四年二月中書門下奏常參官寒食拜掃奉進止
准往例給公券者臣等謹按舊制承前常參官應為私
事請假于州往來並給券牒又奉前年八月勅釐革應
緣私事並不許給公券令臣等商量伏惟寒食拜掃著
在令式銜恩乘驛以表哀榮其應緣私事及拜掃不出
府界假內往來者並不在給券限庶存經制可久遵行
從之

緣祀裁製

舊儀每祭籩豆之數各異至顯慶二年始一例大祀籩豆各十二中祀每十小祀各八

舊儀注大祀中祀並前七日筮日小祀並前五日筮日皆於太廟南門之外卜吉而行之其遇廢務日並不迴避

貞元十五年十二月一日太常卿齊抗等奏每年大中小祀都七十祭其四立二分二至臘上辛吉亥等日蓋

為氣節也其後寅後申後亥後丑等日蓋謂星次也伏以氣行有時刻星位有次舍或定用日或定用辰不可改移請依舊制其或有別禱祭即是太卜署擇日並請准四月六日勅廢務日不用遂為故典

舊儀注無日食廢祭之文元年建丑月祠部奏曰來年建寅月一日祈穀祀昊天上帝是月司天臺預奏其日太陽虧時禮儀使于休烈奏曰臣謹按曾子問曰當祭而日食其祭也如之何夫子曰接祭而已矣牲至未殺

則廢漢初平四年正月當祭南郊日食又行冠禮博士
臣與八座議以為正月元日太陽虧而冠有裸獻之禮
有金石之樂是為聞灾不肅見異不怵惕也伏望下太
常別擇日其二日祭太一准禮儀物同祠所既緣日食
各守本司亦望同下太常更擇日制曰可

舊制每歲大中小祀凡七十九祭皆刻定日辰著為祀
典其與本文相當則祭更不卜日三十四祭准禮但言
時月不定日辰太卜署至時擇日

正月一十二祭

上辛祈穀祀昊天上帝于圜丘祀前一日祭高祖一室
立春日祀青帝于東郊亥日享先農于東郊立春後丑
日祀風師于國城東北立春日祭東岳天齊王東鎮東
安公東海廣德王東瀆長源公以上准禮令
著定日薦獻太清
宮享太廟祀九宮貴神于東郊以上至
時卜日

二月十祭

上丁釋奠文宣王上戊釋奠武成王春分祀朝日于東

郊社日祭太社太稷

以上准禮
令著定日

祭五龍壇祭馬祖開冰

井祭司寒之神祭東冰井西冰井享文敬太子惠昭太

子廟並同日

以上至
時卜日

四月十祭

立夏日祀赤帝於南郊立夏後申日祀雨師雷師于國

城西郊立夏日祀南岳司天王南鎮永興公南海廣利

王南瀆廣利公

以上著
定日期

薦獻太清宮享太廟雩祀昊天

上帝于圜丘祀前二日告太宗一室

以上至
時卜日

五月四祭

夏至日祭皇地祇于方丘祭前二日祭太宗一室

以上著定

日期

祭先牧享文敬太子惠昭太子廟

以上至時卜日

六月四祭

季夏土王日禮黃帝于南郊同日祭中雷中岳中天王

以上著

定日期是月復祭廣德王

七月八祭

立秋日祭白帝于西郊立秋後辰日祀靈星于國城西

南立秋日祭西岳金天王西鎮成德公西海廣潤王西

瀆靈源公

以上著
定日期

薦獻太清宮享太廟

以上至
時卜日

八月八祭

上丁釋奠文宣王上戊釋奠武成王秋分祀夕月於西

郊社日祭太社太稷

以上著
定日期

祭馬祖享文敬太子惠昭

太子廟

以上至
時卜日

九月二祭

季秋大享明堂享前二日告憲宗一室

以上至
時卜日

十月十祭

立冬祀黑帝於北郊立冬後亥日祀司中司命司人司

祿於國城西北立冬日祭北岳安天王北鎮廣寧公北

海廣澤王北瀆清源公

以上著
定日期

薦獻太清宮享太廟祭

神州地祇於北郊祭前二日告高祖一室

以上至
時卜日

十一月六祭

冬至日祀昊天上帝于圜丘祀前二日告太祖一室

以上

著定
日期貢舉人謁先師祭馬步享文敬太子惠昭太子廟

以上至
時卜日

十二月六祭

寅日蜡祭百神于南郊卯日祭太社太稷辰日臘享太

廟奏祥瑞

以上著
定日期

季冬太清宮奏祥瑞藏冰祭司寒東

冰井西冰井並同日用

以上至
時卜日

開元九年六月五日太常奏曰伏准唐禮祭五岳四瀆
皆稱嗣天子祝版皆進署切以舜典五岳視三公四瀆
視諸侯則不合稱嗣天子及親署其祝文伏請稱皇帝

謹遣某官某致祭于岳瀆之神從之

二十三年正月七日勅承前所給明衣多於齋夕付物
既不先造徒有其名自今以後明衣絹布並祠前五日
先給傳監祭使具點閱仍永為常式至大厯六年十一
月三日勅自今以後五品以上及監察御史太常博士
宜准式給明衣絹及浴巾餘准常例其布絹支左藏庫
青苗物充其月二十日詔自今以後有大祭宜差丞相
特進少保少傅尚書賓客御史大夫攝行事至天寶七

年六月八日勅自今已後每差攝祭官宜令吏部採擇朝廷有德望者充

天寶五年五月專知祠祭使王璵奏諸色祭官等並寬縱日久不懼刑憲當祭之日或逢泥雨或值節序盡皆請假曾無形跡今後臣皆私自察訪實無事故妄請假及不肅敬者錄名奏聞望加貶責應緣行事或稍後到小疎遺望請董事大小便牒所司奪其俸祿勅旨從之九年十一月三日制曰春秋祭享用存昭敬祝史陳信

必在正辭苟名位之或非於上下而非便承前有事宗廟皆稱告享茲乃臨下之辭頗乖尊上之義靜言斯稱殊未為允自今以後每親告享太清太微宮改為朝獻有司行事為薦享凡諸陵改為朝拜有司行事為拜陵應緣諸事告宗廟者並改為奏其郊天后土及諸祀祝文云敢昭告並改為敢昭薦以為告者臨下之制故也式從變禮庶表誠心宣示中外令知朕意其載四月二十九日制頃者每祀黃帝乃就南郊義實有乖禮亦非

便稽諸體式理固不然宜於皇城內西南就坤地改置
黃帝壇朕當親祀以昭誠敬仍令中書門下與禮官等
更深詳定聞奏至十二月三日詔禮神以玉奠取其誠
精潔表心溫潤合德自馮紹貞奏後有司用珉禮所謂
君子貴玉而賤珉不可用也況國家之富有萬方之助
祭豈於天地宗廟奠玉有虧自今以後禮神六器宗廟
奠玉並用真玉諸祀用珉如以玉難得大者寧小其制
度以取其真

寶應三年五月四日吏部尚書劉晏奏諸色祠祭委禮儀使撰禮料為常式祭前點檢祭器及饌物明衣有不
在者所由量事科決其行事官若出齋宮及不到明衣
及科不得妄制曰可

上元元年四月赦文有司所立秘祝之法或移于歲或
移於人君人之心寧所忍也自今以後削去其法其中
祀下祀并雜祭禮等一切停其諸應合祭禮列于常典
所用祭料一依古制務從減省以副朕心至貞元元年

卷二十三
二月十七日太常卿崔縱奏立春後丑日祀風師立夏
後申日祀雨師立秋後辰日祀靈星立冬後亥日祀司
中司命司人司祿准上元元年制中祀小祀一切並停
至永泰二年有勅復風師雨師其靈星司中司命等壇
宜令所司准開元禮配享

大歷七年八月禮儀使楊綰奏祀官祀前一日從齋所
集於太常寺一時赴祭所如祭在皇城内者則不集制
從之仍永為常式至十四年六月十八日大內皇城留

守張景所奏得御史臺牒景風安上等門每至祠祭日
緣祭官到尚書省受誓誡了赴朝准舊例合早開又准
監門式皇城門無文早開勅旨自今以後祠祭受誓誡
官其日既赴尚書省不須入朝貞元六年正月詔書官
有私喪公除者聽赴宗廟之祭初御史監察者關白禮
凡有總麻以上喪不得享薦於是吏部奏申明格令使
行之可守九月祔服既葬公除及聞哀已滿者請許告
服赴宗廟之祭其同宮未葬雖公除者請依前禁之輕

重有倫以一王法從之八年七月將作監元亘當攝太尉薦祭享昭德皇后廟以其私忌日不受誓戒為御史劾奏令尚書與禮官法官集議於是尚書左丞相盧邁等奏曰謹按禮記云大夫士將奏祭于公既視濯于父母死猶是奉祭也又按唐禮散齋有大功喪致齋有周親喪齋中疾病則還家不奉祭祀皆無忌日不受誓戒之文雖假寧令忌日有給假一日春秋之義不以家事辭王事今一旦以假寧常式而廢攝祭新命酌其輕重

誓戒則崇祀之嚴校其禮式忌日乃循常之制詳求典據緣薦獻不宜以忌日為辭由是亘坐罰

元和三年四月太常禮院上言太廟時享乃告廟朔望薦食同日謹按禮祭不欲數伏以太廟禘祫祭禮重于時享准禮時享與禘祫同月即其月但行禘祫不行時享蓋不欲煩是禮先重者今時享月于朔望薦食詳求禮情參酌輕重于時享之月其朔望薦食亦合便停若兩禮兼行即祭恐煩黷伏請每至時享及臘享但行享

禮其月朔望薦食請停餘月一准舊制如告廟日與朔望薦食日同伏請先行告禮然後薦食所冀疎數有節合于禮中從之

長慶二年十一月監察使監察御史蘇景胤奏祠祭稱定出齋宮等舊例准廟參不到四品以上罰二千文五品以上罰一千文伏緣所罰稍輕更請加罰詔曰郊廟之儀本於恭恪罰輕生慢須議稍加自今以後有臨祭出齋者宜罰一月俸仍委監察使每具所罰官名銜聞

奏

太和九年十一月兵部尚書判太常卿充禮儀詳定使
王起請創造禮神元寶玉奏議曰邦國之禮祀為大事
拜璧之儀經有前規謹按周禮祀天地四方以蒼璧祀
天黃琮禮地青珪禮東方赤璋禮南方白琥禮西方玄
璜禮北方又有四珪以禮天兩圭有邸以禮地圭璧以
祀日月星辰凡此九品器皆禮神之玉也又云以禋祀
昊天上帝鄭玄云禋烟也為玉幣祭訖燔之而升烟以

報陽也今與開元禮儀同此則焚玉之驗也又周禮掌國之玉鎮大寶器若大祭訖事而藏之此則收玉之証也梁代崔靈恩撰三禮義宗云凡祭天神各有二玉一以禮神一則燔之禮神者訖事却收祀神者與牲供燎則靈恩之義合于禮經今國家郊天地祀神之玉常用禮神之玉則無臣等請下有司精求良玉創造蒼璧黃琮等九器祭訖則藏之其燎則依常式從之

牲牢

武德元年十一月九日詔祭祀之本皆以為身窮民事
神有乖正直殺牛不如禴祭明德即是馨香望古推今
民神一揆其祭園丘方澤宗廟以外並可止用少牢舊
用者宜用特牲待時和年豐然後克修常禮

開元二十二年正月一日勅自古聖帝明王岳瀆海鎮
祭用牲牢餘並以酒脯充奠

天寶二年閏二月勅祭必奉牲禮有歸胙蓋將興施惠
之教以廣神明之福比來胙肉所進頗多自茲以後即

宜少進仍分賜祭官及應入衙常參官厨共食六載正月赦文祭祀之典犧牲所備將有達於虔誠蓋不資於廣殺自今以後每大祭祀應用騂犢且令所司量減其數仍永為常式其年起請天地合祭四時各用二犢五常迎氣各用一犢冬至圜丘用一犢夏至方澤用一犢九宮貴神四時祭每祭各用一犢神州用一犢太廟五享每用一犢東京准上文宣王三祭每祭各用一犢東京三祭五岳每載一祭各用一犢右據舊料每載用犢

五百一十四頭今請減一百六十五頭既用三十九頭
餘祠享並請停用犢至上元二年九月二十二日赦文
國之大事郊祀為先貴其至誠不美多品黍稷雖設猶
或非馨牲牢空多未為能享園丘方澤任依常式宗廟
諸祠但臨時獻熟用懷明德之馨庶合西隣之祭其年
起請昊天上帝太廟各太牢一羊豕各三餘祭隨事而
供太廟羊豕
舊各九頭

大歷六年十二月三日勅五方上帝九宮並大祀朝日
欽定四庫全書

夕月百神大社先農釋奠並中祀自今以後大祀用犢
中祀用猪羊各一委所司支給送太常入滌其副准前
貞元十八年五月太僕奏每年四季送太常入滌羊犢
送後或稱暴死准式埋訖慮有侵冒真偽難明伏以毛
色羊犢甚難擇採如有病死者望還太僕卿准數送替
庶易辨明永為常式制曰可

忌日

貞觀十九年太宗親征高麗以五月五日行至遼陽既

屬高祖忌日八座奏言臣等謹按禮云君子有終身之
憂而無一朝之樂此所謂星迴歲改親沒同辰思其居
處不為樂事今陛下親御六軍已登寇境庶務繁擁伏
待制決可以尊先聖之常經畧近代之一志望請所有
軍機要務百司依式聞奏手詔答曰今既以軍戎大事
不可失在機速所以仰順古風俯從今請神功元年七
月清邊道大總管建安王攸宜破契丹凱還欲以是日
詣闕獻俘內史王及善以為軍將入城例有軍樂今既

國家忌月請備而不奏鳳閣侍郎王方慶奏曰臣按禮經但有忌日而無忌月晉穆帝納后用九月其月是康帝忌月于時疑不定下太常禮官荀訥議稱只有忌日無忌月若有忌月即有忌時忌歲益無禮據當時從訥所議軍樂是軍容與常樂不等臣謂振作於事無嫌

貞元五年八月勅天下諸上州並宜國忌日准式行香十二年五月詔先聖忌辰纔經叙慰戚里之內固在肅恭而乃遽從燕遊飲酒作樂既乖祀法須有所懲前邠

州長史郭煦宜於袁州安置前南郭縣尉郭暄於柳州
安置曹自慶配流冰州其駙馬郭曖王仕平仍令勒歸
私第先是初經代宗忌辰駙馬諸親悉詣銀臺奉慰及
迴王仕平遂邀駙馬郭曖張昭賢張怙及曖女婿嗣許
王昭曖堂弟煦暄用教坊音聲詣曹自慶並於宅中歡
樂上怒之因有此詔尋亦許曖及士平出入

永貞元年十二月中書門下奏昭成皇后竇氏按國史
長壽二年正月二日崩其時緣則天臨御用十一月建

子為歲首至中宗復舊用夏正即正月行香廢務日須改正以十一月二日為忌

元和元年正月修撰官太學博士韋公肅上疏曰准禮無忌月禁樂今太常及教坊以正月是國家忌月停習郊廟享宴之音中外士庶咸罷慶樂伏尋經典切恐乖宜臣謹按禮記有忌日不樂無忌月之文漢魏以降代襲斯旨惟晉穆帝將納后以康帝忌月下議禮官荀訥王洽曹耽王彪之並當時知禮者皆稱有忌日無忌月

若有忌月即有忌時忌歲益無禮據時從其議伏以仍
前所禁皆在二十五月之中今既代遠禮須改革臣又
聞統人立法必守先王之常經企及俯就不違聖哲之
明訓下盡羣言上留玄鑒不以私懷而踰于禮節又記
曰禪月從樂明王制禮漸去其情不應以追遠而立禮
反重也今太常停習郊廟之樂是反重而慢神有司禁
中外之音是無故而去樂詳其前典情禮不倫考其沿
襲又無所據儻陛下正因循之越度法經典之明文得

禮之宜傳于史冊天下幸甚詔傳中書門下令召太常卿與禮官等學官詳議可否中書門下奏曰忌日太常寺及教坊悉停閱習中外士庶亦皆禁斷准禮及歷代典故並無忌月禁樂請依常教習者勅旨宜依其士庶之家亦宜准此

開成四年十月戶部侍郎崔彛奏臣伏以國忌行香事不師古聖心求理動法典章臣頃于延英奏陳願有釐革陛下令史官尋討起置無文昨日閣中再承顧問雖

因循未變亦無損于盛朝而除去不經冀流著於異日
勅旨朕以郊廟之禮奉在祖宗備物盡誠庶幾昭格恭
惟忌日之感所謂終身之憂而近代以來歸依釋老微
二教而設食會百辟以行香將以仰奉聖靈冥資福祐
有異皇王之術頗乖教義之宗昨因崔蠡奏論遂遣討
尋本末經文令式曾不該載世俗因循雅重釐革其京
城及天下州府國忌日寺觀設齋行香起自今以後並
宜停其月御史臺奏請國忌日天下依舊不舉樂不視

事不鞭笞伏以道釋二教漫瀟虛無陛下審所歸依誠
契至理但以列聖忌日行香及茲修崇示人廣孝兼以
天下州縣不舉樂不視事不鞭笞以此海內蒼生常知
列聖廟號令既停罷行香之後勅內又無其日徹樂廢
公止行如舊之文伏恐遐遠之地迷其所向便與居常
之日率皆無殊臣思此事終闕聖慮禮曰君子有終身
之憂而無一朝之患故忌日不樂謂不舉吉事也伏願
陛下聖睿留想若以設齋資福事屬不經起今罷之已

有詔旨其日天下州縣不舉音樂不視公事不行鞭笞
伏請重下明制依前遵守則凡在遐陬逮于蠻貊不忘
廟號有裨孝理之源勅旨設齋行香近已釐革遏密停
務自有典常臺司舉奏意在詳密宜依至宣宗即位奉
勅先以列聖忌辰行香既久合申冥助用展孝思其京
城及天下州府諸寺觀國忌行香一切仍舊

太和七年三月勅准令國忌日惟禁飲酒舉樂至于科
罰人吏部無明文但緣其日不合釐務官曹即不得決

斷刑獄大小笞責在禮律固無所妨起今後縱有此類

臺府更不要舉奏

均王傅王堪男損國忌日干私第決責從人為御史臺所奏遂下此勅

十五年五月太常禮院奏睿宗神主祧遷其六月二十日忌并昭成皇后十二月二日忌准禮合廢從之

開成四年五月太常寺奏今月二十二日祀先農於東郊其日與穆宗皇帝忌日同太和七年十二月八日季冬蜡祭百神與敬宗皇帝忌日同准其年十二月六日勅近廟忌辰奏樂非便冬季蜡祭又不可移變禮從宜

古有明據宜令其日懸而不樂庶叶典經今月二十二日祀先農欲准先勅懸而不樂從之

天祐二年八月八日太常禮院奏今月十二日照宗皇帝忌其日百官閣門奏慰後赴寺行香請為永式從之

諱

武德九年六月太宗居春宮總萬幾下令曰依禮二名義不偏諱尼父達聖非無前旨近代以來曲為節制兩字兼避廢闕已多率意而行有違誥令其官號人名及

公私文籍有世及民兩字不連續者並不須避

永徽二年十月七日尚書左僕射于志寧奏言依禮舍故而諱新故謂親盡之祖今皇祖弘農府君神主上遷請依禮不諱從之

顯慶五年正月一日詔孔宣設教正名為首戴聖貽範嫌名不諱比見抄寫古典至于朕名或缺其點畫或隨便改換恐六籍雅言會意多與九流通義指事全違誠非立書之本自今以後繕寫舊典文書並宜使成不須

隨義改易

延和元年賈曾除中書舍人固辭以父名忠同音議者
以為中書是曹司名又與曾父音同字別於禮無嫌曾
乃就職

永貞元年十二月改淳州為蠻州睦州還淳縣為清溪
縣橫州淳風縣為從化縣淳于姓改為于以音與憲宗
名同也論者以古不諱嫌名若禹與雨驅與區臨文不
諱若文王名昌武王名發周詩曰克昌厥後又曰一之

日感發魯莊公名同春秋曰同盟于幽宣公名午書曰
陳侯午卒之類是也今古時變故廣避焉初憲宗為廣
陵王順宗詔下將冊為皇太子數日兵部尚書王詔上
陳請改名紹本名與憲宗諱同時君子非之曰皇太子
亦人臣也東宮之臣當請改耳奈何非其屬而遽請改
名以避豈得為以禮事上耶左司員外郎李藩曰歷代
故事皆因無經學之臣而失之卒不可復正多此類是
時常貫之為監察御史名與東宮同獨不請改既而下

詔以陸淳為給事中改名質充皇太子侍讀貫之不得已乃上疏改今名大臣溺于風俗以為細事而不正之非故事也

開成元年十一月中書舍人崔龜從奏前婺王府參軍宋昂與御名同十年不改昨日參選追驗正身改更稍遲殊戾勅旨宜殿兩選

會昌六年四月二十日勅中外官寮有名與御名同者及文字點畫相似今後即任奏改音韻文字點畫不同

不在奏改之限

咸通十二年七月侍御史李谿以奏狀內字與廟諱音同罰一季俸復執奏曰臣按禮記不諱嫌名又職制律諸犯廟諱嫌名不坐注云若禹與雨謂聲則同而字則異也今若受罰是違典例乃免之

天祐元年二月二十九日中書門下奏太常寺止鼓兩字敬字上犯御名請改曰肇從之

唐會要卷二十三

欽定四庫全書

史部

唐會要卷二十四至
七

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣王學海

謄錄監生臣許溶

欽定四庫全書

唐會要卷二十四

受朝賀

宋王溥撰

舊制元日大陳設

皇太子獻壽次上公中書令奏諸州表黃門侍郎奏祥瑞戶部尚書奏諸州

貢獻禮部尚書奏諸藩貢獻犬

史奏雲物侍中奏禮畢

然後中書令又與供奉官獻壽

禮殿上皆呼萬歲按舊

儀闕供奉官獻壽禮但依位次立

禮畢竟無拜賀開元

二十五年李林甫革其舊儀奏而行之

冬至亦然

貞觀十三年十月三日尚書左僕射房玄齡奏天下太

平萬幾事簡請三日一臨朝詔許之至二十三年九月十一日太尉無忌等奏請視朝坐日上報曰朕登大位日夕孜孜尤恐壅滯衆務自今以後每日常坐其後至永徽二年八月二十九日下詔來月一日太極殿受朝此後每五日一度太極殿視事朔望朝即永為常式顯慶二年二月太尉長孫無忌等奏以天下無虞請隔日視事許之

聖歷三年正月制朝官有期喪大功未葬不得朝賀

神龍元年二月朝則天皇帝於上陽宮因勅每十日一朝左臺侍御史盧懷慎上表曰臣聞昔漢祖受命五日一朝太公於櫟陽宮今日陛下豈不欲為此乎臣度其事業與此有異夫漢祖起布衣登皇極有天下尊歸於父故行於此耳今陛下守文繼統嗣武開基奉三聖之休烈當千齡之寶命順天立極蓋曰其常不知何為更用此道遠自三五洎乎夏殷聖帝明王臣所覽見未有用此者陛下安所取哉臣聞事不師古匪說攸聞禮煩

則瀆抑其有義況應天去提象纔至二里餘騎不得行列車不得方軌於茲屢出假令愚人萬一有犯屬車之塵者陛下雖罪之何及縱使萬全亦非慎重之道也臣望陛下從今以後遵其內朝一則有暢於清溫二則無煩於出入敬慎之道誰曰不然必長至在辰元正布歷應天納祜行慶有期則願陛下備法駕周羽儀然後出朝亦示天下大禮也居常之日竊願陛下思之其年四月二十七日上以時屬炎暑制令每隔日不坐右拾遺

靳恒上疏諫曰臣聞昔漢制反支日亦通奏事又光武
在軍躬自覽疏明帝撫運夜必讀書豈以四氣炎寒妨
于政理況陛下紹登大位初啓中興六合之內莫不延
首傾聽威恩未著忠信未孚勤勞者未達寃滯者未舉
逋逃者未還浮偽者未息兼之國用凋敝倉廩空虛獄
訟猶繁澆淳尚雜外逼凶寇調發未寧內切饑寒衣食
不足人思陛下企望太平久矣陛下固宜兢兢業業居
安慮危絕嗜慾之源從清靜之化宵衣旰食以答蒼生

之望簡賢任能以救蒼生之弊使天下翕然一變化俗奈何以其微熱遂闕一日萬幾之事六合之內家到戶說必謂陛下安其宮室重其宴閒忽於黎庶怠於聽政復何以達堯心於天下復何以垂令範於後代臣愚竊為陛下有所嘆息

開元八年九月初正冬朝會宴見蕃國王臨軒設樂懸陳車輅備麾仗其朝日受朝儀注減半其年十一月十三日中書門下奏曰伏以十四日冬至一陽初生萬物

潛動所以自古聖帝明王皆以此日朝萬國觀雲物禮
之大者莫逾是時其日亦祀圜丘皆令聽攝官行事質
明既畢日出視朝國家以來更無改易緣脩新格將其
日祀圜丘遂改用小冬日受朝若親拜南郊受賀須改
既令攝祭理不可移伏請改正從之因勅自今以後冬
日受朝永為常式至天寶三載十一月五日甲子冬至
勅伏以昊天上帝義在尊嚴恭惟祭典每因冬至既於
是日有事圜丘更受朝賀實深兢惕自今以後冬至宜

取以次日受朝仍永為常式至永泰二年十一月三日詔以十三日甲子冬至令有司祭南郊於含元殿受朝賀至建中二年十一月二十日勅宜以冬至受朝賀

天寶六載十二月二十七日勅中書門下奏承前諸道差使賀正十二月早到或有先見或有不見其所賀正表但送省司又不通進因循日久於禮全乖望自今以後應賀正使並取元日隨京官例序立便見通事舍人奏其表直送四方館元日仗下候一時同進勅旨依

大歷九年十一月八日勅故源王發引遷神廢冬至朝
賀十四年十二月三十日勅元日門下侍郎奏祥瑞宜
停至貞元四年十一月十三日中書侍郎李泌奏冬至
朝賀請准元日中書令讀諸方表勅旨宜依

建中元年十一月朔御宣政殿朝集使及貢士見自兵
興以來典禮廢墜州郡不上計內外不會同者二十五
年至此始復舊典

州府計至者一百七十有三

二年正月朔御含元

殿四方貢獻列為庭實復舊例也

貞元七年四月二十八日勅昔者聖賢仰觀法象因天地交會之序為父子相見之儀沿襲成風古今不易王者制事在於因人酌其情而用中順其俗而為禮咸覲之義既行父子之間資事之情豈隔君臣之際申恩卿士自我為初自今以後每年五月一日御宣政殿與文武百寮相見京官九品以上外官同朝奏在京者并聽就列宜令所司即量定儀注頒示仍永編禮式

本以五月一日

陰生臣子道長君父道衰非善月也因創是日朝見之儀初欲冕服御宣政殿屬塗潦乃以常服御紫宸殿

至元和三年四月詔五月一日御宣政殿受朝賀禮儀

停

先是創有此禮自後亦不多行至是上以術數之說禮經不載遂罷之

九年正月朔上

御紫宸殿受朝賀退賦觀仗歸營詩十一年十一月日南至不受朝賀以司徒馬燧出葬故也

會昌二年四月中書門下奏元日御含元殿百官就列惟宰相及兩省官皆未索扇前立於檻欄之內及扇開便侍立於御前三朝大慶萬拜稱賀惟宰相侍臣同介胄武夫竟不拜至尊而退酌於禮意事未得中臣等商

量請御殿日昧爽宰相兩省官對班於香案前俟扇開
通事贊兩省官再拜訖遂陞殿侍立從之

咸通四年五月朔宴回鶻於上清殿非常例也

諸侯入朝

貞觀元年十一月梁州都督竇軌請入朝上曰君臣共
事情猶父子外官久不入朝情或疑懼朕亦須數見之
問以人間風俗許令入朝至十五年正月上謂侍臣曰
古者諸侯入朝有湯沐邑芻禾百車待以客禮漢家故

事為諸州刺史郡守創立邸舍於京城頃聞都督刺史
充考便至京師皆賃房與商人雜居既復禮儀不足必
是人多怨嘆至十七年十月一日下詔令就京城閒坊
為諸州朝集使造邸第三百餘所上親觀焉至永淳二
年關中饑乏諸州邸舍漸漸殘毀至神龍元年司農卿
趙履溫希媚權要奏請出賣並盡至建中元年十月二
十九日勅每州邸第令本州量事依舊營置至三年五
月十四日戶部奏若令州府自買事又煩費伏請以官

卷二十四
宅三十所分配共住過事却收勅旨宜依二十年有司上
言按漢儀注朝賀正月常一王四侯十餘載一至又按
史記諸侯王朝凡四見留長安不過三十日今諸王入
朝者甚多非謂示之簡要弘之禮節既乖古制有虧前
典臣請每歲二王入朝禮畢還藩敢以義請從之

顯慶二年十二月勅諸都護刺史入朝日及新授未辭
因便在京朝會一事以上並同京官

先天二年十月勅諸蕃使都府管羈縻州其類極廣每

州遣使朝集頗成勞擾應須朝賀委當蕃都督與上佐
及管内刺史自相通融明為次第每年一蕃令一人入
朝給左右不得過二人仍各分頒諸州貢物於都府點
檢一時錄奏開元八年十月勅諸督刺史上佐每年分
蕃朝集限十月二十五日到京十一月一日見其年十
一月十二日勅諸州朝集使長官上佐分蕃入計如次
到有故判司代行未經考者不在禁限其員外同正員
次正官後集

十四年二月勅嶺南五府管內郡武安萬安等三十二州不在朝集之限其承前貢物者並附都府貢進十八年十一月勅靈勝涼相代黔窩豐洮朔蔚媯檀安東疊廓蘭鄯甘肅瓜沙嵐鹽翼戎慎威西牢當郎茂驩安北庭單于會河岷扶柘安西靜悉姚雅播容燕順忻平靈臨薊等五十九州為邊州揚益幽潞荆秦澧廣桂安等十州為要州都督刺史並不在朝集之例

二十二年十一月勅諸朝集使十日一參朔望依常式

應須設食等准例處分

永泰元年正月宰臣王縉等奏春秋之義臣子一例今後有大臣入朝百寮望請朝罷於中書行相見之禮其宴餞准故事於鴻臚亭集從之

時上優寵大臣入覲之日建百官朝罷行相見

之禮

大歷十四年六月勅諸州刺史上計如式

建中二年七月二十二日勅諸州府今年朝集使宜且權停其貢物及文解等准例今考典赴一都

貞元十三年徐州節度使張建封來朝及命歸鎮上御

製詩以賜之

牧守共所重才賢生為時宣勞自擢授越次膺藩維入覲展遐戀臨軒慰來思忠誠

在方寸感激陳情辭報國爾所尚恤人余是資歡宴不盡懷車馬當還期穀雨將應候行春應未遲勿以千里遙而云無已知又命中使齎所執鞭以賜之曰以卿大節歲寒

不移故賜此鞭以表之十七年閏正月夏州節度使右

僕射韓全義來朝自入覲及歸不見不辭于正朝

時全義自

夏州節度使為蔡州招討及赦吳少誠全義至闕不見不辭于正朝也

元和十四年六月魏博節度使田弘正來朝賜宴于麟

德殿其大將三百餘人賜物有差

十五年二月勅淄青統押海蕃每年皆有朝事比差部領人數校多今後差官正試相兼不得過五人

長慶四年勅節度觀察使入朝不得別有進獻

會昌元年六月勅東川節度使鄭復雖稱有疾擅離本道宜釋放以後藩鎮如更違越必舉憲章

大中五年正月勅自今以後諸道節使防禦經畧等使有請覲者但先獻表章請得詔旨許允即任進發務使

行止之際臨時不失事機

二王三恪

武德元年五月二十二日詔曰革命創業禮樂變於三
王脩廢繼絕德澤隆於三代是以鳴條克罰杞用夏郊
牧野降休宋承殷祀爰及魏晉禪代相仍山陽賜號於
當塗陳留受封於典午上天迴睠授厯朕躬隋氏順時
遜其寶位敬承休命敢不對揚永作我賓宜開土宇其
以莒之鄫邑奉隋帝為鄫公行隋正朔車旗服色一依

舊章仍立周後介國公其為二王後至二年五月鄴公
薨追崇為隋帝諡曰恭

貞觀二年八月制曰二王之後禮數宜崇寢廟不嚴廩
餼多闕非所以追崇先代式敬國賓可令所司量置國
官營立廟宇

永昌元年十一月一日制以周漢之後為二王仍封舜
禹成湯之裔為三恪至神龍元年五月十日制宜依舊
以周隋為二王後

開元三年二月勅二王後每年四時享廟牲及祭服祭器並官給及帷幄几案有闕亦官給主客司四時省問子孫准同正三品蔭隋後每年給絹三百疋米粟三百石周後每年賜絹二百疋粟二百石並春秋支給仍准見承襲人親兄為分襲者與三分餘各一分兄弟有得職事官者其物即還見襲人十五年閏九月勅二王後為賓者會賜同京官正三品其夫人亦同諸王公以下無子孫以兄弟之子曾經侍養者聽承襲

贈爵者亦准此

若死

王事雖不曾經侍養亦聽承襲又二王後犯罪當除爵者改立次賢

天寶七載五月十三日制自古帝王建邦受命必敬先代周備禮文既存三恪之位漢從損益惟立二王之後自茲以降且復因循將廣繼絕之恩式弘復古之道宜於後魏子孫中擇揀灼然相承者一人封為韓公准鄩介公例立為三恪

九載六月六日處士崔昌上封事推五行之運國家上

承周漢其周隋不合為二王後請廢詔下尚書省集公卿議昌負獨見之明羣議不能屈會集賢學士衛包抗表陳論議之夜四星聚於尾宿天象昭然上心遂定乃求殷周漢後為三恪廢韓介鄴等公以昌為贊善大夫包為虞部員外郎至十二年五月九日魏周隋依舊為三恪及二王復封韓介鄴等公其周漢魏晉齊梁帝王廟依舊祭六月九日崔昌衛包等俱貶官太和五年正月鄴國公楊元濬奏臣先祖隋文帝等陵四所在鳳翔

一所揚州兩所京兆府一所准去年四月九日勅二王
後介國公先祖陵例每陵每月合給看守丁三人鳳翔
府已蒙給丁訖其京兆府及揚州未蒙准勅例給勅旨
各令州府准元勅處分

開成五年十月勅介公宇文士元亡宜輟今月五日朝
參便為常式

會昌三年八月中書門下奏二王後為國賓又是一品
前年方與輟朝請編入令式從之

朔望朝參

貞觀二十二年十月八日令百寮朔望日服袴褶以朝
永徽元年十月五日京官文武五品依舊五日一參
神龍元年四月十四日初令文武官五品以上每朔望
參日陞殿食

先天二年十月勅文武官朝參著袴褶珂繖者其有不
著入班者各奪一月俸若無故不到者奪一季祿其行
香拜表不到亦准此頻犯者量事貶降其衣冠珂繖仍

許著到曹司

開元中蕭嵩奏每月朔望皇帝受朝於宣政殿先列仗衛及文武四品以下於庭侍中進外辦上乃步自序西門出陞御座朝罷又自御座起步入東序門然後放仗散臣以為宸儀肅穆升降俯仰衆人不合得而見之乃請備羽扇於殿兩廂上將出所司承旨索扇扇合上座定乃去扇給事中奏無事將退又索扇如初令為常式開元二十五年御史大夫李通奏每至冬至及緣大禮

應朝參官并六品清官並服朱衣餘六品以下許通著袴褶如有喪故准式不合著朱衣袴褶者其日聽不入朝自餘應合著而不著者請奪一月俸以懲不恪制曰可

天寶三載二月三十日勅百官朔望參應服袴褶并著珂織至閏二月一日宜停自今以後每逢此閏仍永為常式

六載九月二十一日勅自今以後每朔望朝晚於常儀

一刻進外辦每座喚仗奉朝從容至閭門入至陞外不
須趨走百司無事至午後放歸無為守成宜知朕意至
十二載十一月十三日御史中丞吉溫奏請京官朔望
朝參者朱衣袴褶五品以上著珂織制曰可十三載九
月御史中丞吉溫奏朔望朝參望自今以後除伎術官
外餘官不到兩人以上者及本司官長各奪一季祿五
人以上者奏聽處分至冬應合著袴褶并珂織者不具
者請准勅彈奏從之

十四載三月一日勅常參官分日入朝尋勝宴樂

乾元三年四月十五日勅員外郎五品以上常參官自

今以後非朔望日許不入賊平之後依舊常參

時安史據河洛

故也

廣德二年九月一日勅朝官遇泥雨准儀制令停朝參
軍國事殷若准式停恐有廢闕泥既深阻許延三刻傳
點待道路通依常式以後亦宜准此

天歷七年六月御史大夫李栖筠奏伏以朝廷之儀義

當祇肅今者以手力資錢比俸祿舊罰請准永泰元年
八月勅為定其一司之中有三人以上是參官其日並
不到者本司長官請罰一月手力資錢其一月內三度
不到者雖每度有罰亦准前罰一月資錢每月仍便於
左藏庫折納其有久不朝謁并假過百日以上者望令
本司錄奏如相容隱臺司訪察彈奏餘請依勅處分從
之

又文武常參官或有晚入并全不到及班列失儀查御

史臺錄名牒所由奪一月俸經三度以上者彈奏准開元二十二年三月勅如聞朝官仗下多出側門及中書門下不散自今以後宜令臺司檢察除公事見宰相一切從正門出違者彈奏又准乾元元年勅朝參官無故不到奪一月祿貞元二年八月一日御史中丞竇參奏准儀制令泥雨合停朝參伏以軍國事殷恐有廢闕請令每司長官一人入朝有兩員并副貳亦許分日其夜甚雨至明不止許令仗下後到外廊食訖入中書其餘官及王府

長官並請停朝任於本司勾當公事泥雨經旬亦望准此

七年十一月詔常參官入門不得奔走其有周以下喪者禁褻服復衣綾袍金玉帶初金吾將軍沈房有弟喪公服不衣褻服入門上問宰臣董晉對曰准式朝官有周以下喪者許服純縵衣不合淺色上曰南班何得有之對曰因循而然又曰在式朝官皆以綾為袍五品以上服金玉帶取其文綵華飾以奉上也昔尚書郎含香

此意也

八年十月復命金吾置門籍

十二年四月御史中丞王顏奏吏部兵部禮部侍郎郎中員外郎共一十二員起去年十一月一日至今年三月三十日並不朝參此謂選限內不朝又憑格勅去三月二十一日輟朝前件官並闕奉慰臣按中書門下省并兵部吏部勅格無文伏以國朝故事開元以前自假節日百官盡入朝至天寶五載始放旬節假日不入近

年又賜分日伏緣優貸之厚反致慢易之愆請自今以後吏部兵部尚書侍郎除試人銓注曹官并禮部侍郎兵部南曹官試人及入宿日其餘朝參等官並准式尋為吏部兵部禮部奏舉詔又可之

十三年正月御史臺奏諸司常奏文官隔假三月以上並橫行奏假其武班每月先配九參比來或經冬至及歲寒食等三節假滿不足本配入日並不橫行事實乖闕請從自今以後每經三節假滿縱不是本配入日亦

請依文官例參從之其年六月十二日勅卿等朝謁是
常或陰雨不聞鼓聲則不免奔波走馬忽有墜損深軫
朕懷自今以後縱鼓聲差池亦不得走馬及時暑稍甚
雨雪泥潦亦量放朝參

十五年四月膳部郎中歸崇敬以百官朔望朝服袴褶
非古禮上疏曰按三代典禮兩漢史籍並無袴褶之制
亦未詳所起之由隋代以來始有服者事不師古請罷
之奏可

元和元年三月准吏部兵部尚書侍郎郎官并禮部侍郎御史中丞武元衡奏前件等司近起十月至來年三月稱在先選舉限內不奉朝參令式無之禮敬斯闕一年之內半歲不朝去貞元十二年中丞王顏奉勅釐革載在明文尋又因循輒自便改若以兵部禮部舉選限內事繁即中書門下御史臺度支京兆府公事至重朝請如常而況旬節已賜歸休常參又許分日一月之內纔奉十日朝參其間甚熱甚寒皆蒙預放臣以為王顏舉

奏甚詳當時勅文處分甚備請准貞元十一年四月勅
旨自今以後永為常式他年妄改條請委臺司彈奏庶
使班行式序典法無虧依奏

二年十二月御史臺奏文武常參官准乾元元年三月
勅如有朝堂相弔慰及跪拜待漏行立不序談笑喧譁
入衙門執笏不端行立遲慢至班列立不正趨拜失儀
言語微喧穿班仗出閣門不即就班無故離位廊下食
行坐失儀語闌入朝及退朝不從正衙出入非公事入

中書每犯奪一月俸今商量舊條每罰各減一半有犯必舉不敢寬如所由指揮尚抵拒飾非即請准舊例錄奏貶官從之

四年十月御史中丞李夷簡奏准貞元十二年四月中丞王顏元和元年三月中丞武元衡奏兵部吏部禮部侍郎官每年舉選限內不奉朝參又今年所造選格不詳勅文復請明日朝參臣合彈奏勅宜准貞元十二年四月勅處分

九年十二月勅起來年正月以後每朔望日刑部侍郎郎中員外大理卿少卿及中丞一人侍對其日宰相并次對中朝官並不用來

十年三月壬申朔御延英殿召對宰臣故事朔望日御宣政殿見羣臣謂之大朝玄宗始以朔望陵寢薦食不聽政其後遂以為常今之見宰臣特以事召也其年六月勅御史臺自今以後常參官每入班以見到人名銜進來其朔望及雙日勿進是月詔自今以後許寅後二

刻傳點及是質明後朝騎有尚在街中者特生紫宸殿

久之而朝班未至因命宰臣宣諭之乃復

時命宰臣戒九卿御史以

中丞裴度遇盜故也

十四年二月詔朔望據錢多少每貫罰二十五文仍委御史臺檢察聞奏大中四年十月望不視朝以大祀故也

太和元年六月勅文武常參官朝參不到御史中丞魏謩奏准兵部吏部禮部三司尚書侍郎等官一十三員

主舉選試五箇月不朝參近已降流聞奏訖奉勅前後
勅文處分有司不合妄更奏論准貞元十二年元和四
年彈奏前件三司除試人及入宿外並不合不朝參勅
文曾未經年三司復此論奏今具前後勅文如前勅者
本是五箇月不朝今許不過一兩月奏不權放必恐壅
滯准兵部選事勞逸尤與吏部不同選限內遇公事繁
併日准具事由牒臺尋常不在放朝參限

天祐二年十二月勅漢宣帝中興五日一聽朝歷代通

規宜為常式今後每月只許一五九日開延英計九度
其入閣日仍于延英日一度指揮如有大段公事中書
門下具膀子奏請開延英不拘日數

三年六月勅文武百僚每月一度入閣於貞觀殿貞觀
大殿朝廷正衙正至之辰受羣臣朝賀比來視朔依貞
觀儀今後於崇勲殿入閣

廊下食

貞觀四年十二月詔所司於外廊置食一頓

出國朝故事
正史檢

不獲

貞元二年九月舉故事置武班朝參其廊下食等亦宜
加給

唐會要卷二十四